

19. november 2016

**Nunatsinni tunngaviusumik inatsiseqalernissaanik siunnersuusiortussamik isumalioqatigiissitamik pilersitsinissaq Inatsisartut Naalakkersuisunut piginnaatitsissummik tunniussinissaat siunertaralugu Inatsisartunut aalajangiiffissatut siunnersuut.**

(Namminersornermut, Pinngortitamut, Avatangiisinut Nunaateqarnermullu Naalakkersuisoq)

Siumumiit imatut oqaaseqarfigissavarput,

Inatsisartut 2015-imi ukiakkut ataatsimiineranni Inatsisartuni akuersissutigineqarpoq nunatta inatsisinut tunngaviusussamik isumalioqatigiissitamik pilersitsinissaanut nalunaarusiamik suliaqarneq Naalakkersuisunit naammassineqassasoq, inassuteqaat maanna naammassineqarpoq **Kalaallit Nunaanni inatsisinut tunngaviusussanut isumalioqatigiissitamik pilersitsinissamut nalunaarusiaq.**

Erseqqisumik oqaatigisariaqarpoq isumalioqatigiissitamik pilersitsiniarnermi kalaallisut oqaatsivut pisortatigoortumik oqaasiummata tassaassasut atorneqartussat, Nunap aaqqissuusaanera aqunneqarneralu maleruagassanik tunngaviusussanik missingersuusiornera Kalaallisut ingerlanneqassasoq pingaaruteqarpoq.

Isumalioqatigiissitamik pilersitsiniarnermi pingaaruteqarpoq inatsisinut tunngaviusussanut isumalioqatigiissitaq inatsisilerinikkut sulinikkullu kisimi eqqarsaatigineqartussaannngimmat, nunap aaqqissuusaneranut aqunneqarneranullu maleruagassanut tunngaviusunut suliaqarneq naalagaaffiup inatsisitigut aaqqissuuneranut tunngaviusinnaasup ineriartortinnerani oqaluttuarisaanermi pingaaruteqartumik suliaassammat taamaattumik oqaatsivut pingaarutilerujussuarmik inissisimasussaapput.

Taamatutaaq pingaaruteqartigaaq isumalioqatigiissitamik pilersitsereernerme innuttaasut peqataatilluinnarnissaat sutigut tamatigut qulakkiissallugu, isumasiuisarnertigut tusarniaalluni ataatsimittitsisarnikkut minnerunngitsumik aamma ilanngullugu meeqqat paasisitsiniaanermi taakkununga paasiuminartumik peqataatinnissaat, taakkumi nunatsinni siunissami akisussaaffik tigusussammasuk. Taamatutaaq pingaaruteqartigaaq suliniaqatigiiffiit nunatta tunngaviusumik inatsiseqalernissaanut suliaqarnermi peqataatilluinnarnissaat.

Inatsisartut peqataatinneqarnerat eqqarsaatigalugu ataatsimiititaliaagallartumik pilersitsiniarnermi Inatsisinut Ataatsimiititaliaq maannakkut atuuttoq malinnaatitatut peqataatinneqassasoq isumaliuti-geqqunarpoq, inatsisinut tunngaviusussanut isumalioqatigiisitap pilersinneqarnerani pissusissami-soorpoq Naalakkersuisup susassaqtup allattoqarfia qitiutillugu suliaqartoqassasoq kaammattuutigaarput suliasamik matuminnga suliaqartussamik aamma isumalioqatigiisitamutaaq allattoqar-fiusussamik pilersitsisoqartariaqartoq ilanngullugu kaammattuutigalugu.

Isumalioqatigiisitaq qanoq inuttalersugaassava, Siumumi isumaqarpugut nalunaarusiami inassute-qaataasut, inatsisartuni Partiinit aamma maannakkut ilaasortaasut eqqarsaatigalugit Partiit avataa-ni qinigaatitaqartut periarfissinneqassasut. Ilaasortaatitaqarnissaq taamatut katitigaassasoq Siumumi innersuussutigissavarput. Naalakkersuisut piginnaatinneqarnerminni ilanngullugu ilisimaarisaria-qarmassuk piunasaqaatit ersarissuunissaat.

Isumalioqatigiissitamik pilersitsereernermi pingaaruteqarpoq, oqaatigeriissallugu suleqatigiissita-mik pilersitsisoqarsinnaanera isumalioqatigiisitap sulinermini pisariaqartutigut atugassaanik, qanoq inuttalersugaanissaa Partiinit Inatsisartuniillu toqqagaasut akornanni pisariaqartitat sulinermi aallaa-vigalugit inuttaqarnissaa ilanngulluni Naalakkersuisunit toqqarneqarsinnaaqqullugit periarfissiisu-tigineqarnissaa ilanngullugu kaammattuutigaarput.

Isumalioqatigiisitap pilersinneqartussap sulinermini sinaakktigisinnaasai nalunaarusiami ersaris-sumik saqqummiunneqartut tunngaviussasut ilanngullugit Siumumit kaammattuutigaavut, maanna Namminersornermit annerusumik alloriarnissamut aqut periarfissat aporfusinnaasullu qulaajarneqalerneranni.

Nunatta siunissaani nammineq akisussaaffimmik tigusinissaq pineqarpoq taamaattumik innutaasut peqataatinneqarluinnarnissaat pingaaruteqarmat Naalakkersuisunut Siumumiit kaammattutigissa-varput peqataatitsineq qulakeerneqaqqullugu.

Siumumiit taamatut oqaaseqarluta, nunatsinni tunngaviusumik Inatsiseqalernissatsinnik siunnersuu-siortussamik Isumalioqatigiissitamik pilersitsinissaq Inatsisartut Naalakkersuisunut piginnaatitsissu-tigissagaat inassutigaarput.

Nalunaarusiaq saqqummiunneqartoq sulinermi Isumalioqatigiisitallu pilersereernerani pingaarut-  
tilinnik najoqqutarineqarsinnaasunik imaqarpoq suleriaqqinnermilu najoqqutarineqarsinnaasunik  
tikkuussisuummat saqqummiunneqarnera qujassutigaarput.

Aapassaaneerisoqartinnagulu Inatsisinut Ataatsimiititaliami suliarineqarnissaa innersuupparput.

Jens Immanuelson, Siumut